

VALÈRI-BERNARD

LETANÌO

VALÈRI-BERNARD



LETANÌO

Pouesio



M A R S I H O

Imprimarié G. MICHEL

98, Balouard Vauban

1946

POUËSÌO

MARSIHO
Imprimarié G. MICHEL
98, Balouard Vauban

1946

Valère-bernard, artiste-peintre, ancien Capoulié du félibrige, né à Marseille, le 10 février 1860, y mourait le 8 Octobre 1936.

Pour commémorer ce 10^eme anniversaire nous faisons éditer "Letanò". Ces poésies sont parmi les dernières qu'il composa et nous dicta lorsqu'il ses yeux commençait à ne plus voir la lumière qui fut la joie de sa vie.

Pour marquer cette commémoration les Félibres de Marseille organisent des conférences. Celles-ci exalteront l'écrivain, l'artiste-peintre, le graveur que fut Valère Bernard.

A. V.-B.

SANCTA DEI GENITRIX

Un matin de printèms, dóu founs de la calanco,
Soun enfant dins si bras, la Vierge rosó e blanco
Es vengudo, pèd nus, enjusco à moun oustau
E, de sa man lóugiero, a frusta lou pourtau.

Mai iéu, rouncant coume un coucaro
E pantaiant, dourmiéu encaro.

An passa lis annado; un lourd tantost d'estiéu,
Alassado la Vierge emé soun divin Fiéu
Que pourtavo au vilage un gros fais de redorto,
Se soun pausa long-tèms à l'oumbro de ma porto.

Mai ère liuen; m'ère viéuta
Dins l'ourrour di gràndi ciéuta.

Soun vengu tourna-mai en un vèspre d'autouno:
La Vierge seguissié soun Fiéu qu'uno courouno
D'espino lou macavo. En van à moun lindau
M'esperèron, fissant lou cèu eilamoundaut.

E, countuniave, gros pelègre,
A béure un vin espés e negre.

Aro veici l'ivèr; siéu soul a moun fougau,
Estro e porto duberto, e n'aguènt d'autro gau
Que de véire, belèu, la Vierge rosó e blanco
Emé soun Enfant-Diéu sourgi de la calanco.

Vierge! moun regrèt lou mai fèr!
O Vierge! moun soulet espèr!

Lou 1 de Juliet 1934.

SANCTA VIRGO VIRGINUM

En uno orto flourido, entre li jaussemin
E lis ile e li rose, à l'oumbro dis arange,
Uno bruno jouvènto, autant douço qu'un ange,
Apren à lausa Diéu dins l'or d'un pergamin.

Invesiblo, la Vierge à soun caire la bèlo,
Ravido de la veire autant casto, autant bello.

De nivoulo d'argènt mounton à l'ourizount
Coume de ciéune blanc sus une oundo azurenc.
E tout en legissènt, la chato vierginenco
Se clino; sus soun front toumpon si brun frisoun.

Invesiblo dins l'èr, la Vierge l'enmantello
Dins soun mantèu teissu 'mé leu flar dis estello.

Ritmant l'ouro dóu jour, emé lou batemen
Di cigale, s'ausis l'aerenco musico,
E la chato s'assajo à canta de cantico.
Sa voues es un cristau que dindo loungamen.

E la Vierge, en cantant, invesiblo, barbèlo
Pèr la chato au cor pur douço coume uno agnello.

Lou vòu di parpaioun s'arrèsto sus li flour
Pèr escouta. Peréu, sout la ramiho, l'auro,
Retèn soun alenado. E dins lou cèu s'enauro
Un long tressalimen de pas e de belour.

E la Vierge invesiblo emé la vierginello,
Ensèn, canton d'accord la tendro cantinello.

Dins leu fueiage verd flambo la frucho d'or.
Dins l'èr plen de perfum danson de farfantello,
E leu soulèu grasiho, e, plegant li parpello,
La chato sus li flour douçamenet s'endor.

Alor, en un pantai, la Vierge subre-bello
Se mostro, talo qu'es, is iue de la piéusello.

Lou 28 de Juliet 1934.

Φ Φ Φ Φ Φ

MATER CRISTI

Es dins ti bras. Emé quanto tendresso
Sarres l'Enfant divin que te sourris,
Cuerbes soun front e sis iue de caresso.
Parlo; sa voues rajo coume de mèu.
Maire dóu Criste! O Rèino dins lou cèu!

Alor se drèisso e sa man benesis;
La Creacioun entiero fernesia;
La crous triounflo aluminant lou mounde
E l'arc-de-sedo estènd soun arcounseu.
Maire dóu Criste! O Rèino dins lou cèu!

Souto l'aflat de toun cor caste e mounde
Jésus perdoune is ome que, crudèu,
An óublida sa lèi, e que semounde
Un eternau bonur à si fidèu.
Maire dóu Criste! O Rèino dins lou cèu!

Lou 5 de Mai 1934.

Φ Φ Φ Φ Φ

MATER DIVINÆ GRATIÆ

D'inne sèns fin tresanon dins l'espaci.
De Serafin, li bras carga de flour.
En se clinant, Vierge, davans ta faci.
Vènon flouri l'orle de toun mantèu.
Maire divino! O Rèino dins lou cèu!

Trelus auben, ta divino belour
De l'estelan amosso l'esplendour.
Se véri lusi sobre toun front de glòri
Uno courouno ardènto de soulèu.
Maire divino! O Rèino dins lou cèu!

L'inmenseta dóu Paradis fai flòri
A toun entour. Mai dous que de poutoun,
Lou cèu vibrant coume uno arpo d'evòri
Clamo toun noum, de tóuti lou mai bèu:
Maire divino! O Rèino dins lou cèu!

Lou 5 de Mai 1934.

Φ Φ Φ Φ Φ

MATER PURISSIMA

Ti pèd pausa sus lou fousc óurizount,
Lou front perdu dins l'espaci sèns founs,
Ti bras leva tapon la gènt umano
Souto l'azur estela de toun vèu,
Maire tout puro! O Rèino dins lou cèu!

Entre lis atre, au clar de la lugano,
As escracha la tèsto de la serp.
E dins l'abisme, à ta voues soubeirano
S'es enfugi pèr sèmpre l'Aucibèu,
Maire tant puro! O Rèino dins lou cèu!

L'amo doulènto en aquest mounde fèr
Crido vers tu. Siés la Fe, siés l'Espèr,
Lou lume escrèt, siés, la divo proumessò
Dóu Paradis pèr delai lou toumbèu,
Maire tant puro! O Rèino dins lou cèu!

Lou 5 de Mai 1934.

Φ Φ Φ Φ Φ

MATER ADMIRABILIS

Engarlanda de roso e de genèsto,
Lou bastimen de la vido es en fèsto;
Gounflo si velo au boufe dóu gregau.
Li passagié danson, courouno en tèsto.

Es lou printèms, tout respiro la gau.
La Mort vestido em'un sedous jargau
Perfila d'or canto en tenènt l'empento.
Lou bastimen es un ardènt fougau

Ount jouine e vièi, e jouvènt e jouvènto,
Cadun ié pèco, e degun se n'en pènte;
E degun pènso au quicha de la clau,
Franc quàuquis-un, l'amo encaro innoucènto.

Lindo es la mar, sèmblo un inmènse lau,
Un lau d'amour mirant lou catafau

Mounte, cantant, risènt, la Mort feroujo
Vai clavela lou cors de sis esclau.

E tout d'un tèms uno tempèsto auroujo
Boufo; la nau à la perdudo poujo;
Toco la roco e lèu s'aprefoundis
Dins li revòu di foun sour infernoujo.

La brefounié passo. Poutounadis,
Lou cèu es clar e lou tèms pausadis.
L'on vèi flouta, sus la mar ameinado,
Coume un dardai de luno fugidis,

De formo blanco e tutto uno meinado
De Vierge casto e d'amo perdounado
Belant l'amour inefable de Diéu.
D'Ange rabènt, à grand revoulunado,

Coume l'uiau quouro jisclo dóu niéu
A l'ourizount, i caudo niue d'estiéu,
Li vènon querre emé grando alegrio
Pèr lou païs eternamen festiéu,

Pèr lou païs de pas e d'armounio,
Lou Paradis, divino meraviho,
Entre ti bras adourable, o Mario!

Lou 18 de Juliet 1934.

Φ Φ Φ Φ Φ

VIRGO POTENS

Vanitous e tantalòri,
Vouliéu davera la glòri
D'escriéure un libre d'amour,
De passioun e de foulige.
Cado niue fins à l'aubour
Fasiéu rima de nescige.

E mi vers avien la flamboir,
Lis ilusioun e lis error
D'une imaginacioun pagano.
Escriviéu sobre lou balen
De moun oustau, que la lugano
Poudié me servi de calen.

Davans mis iue, de la Mieterrano

Trelusissien lis erso ferrano.
Lou céu cendrous, tau qu'un azimant,
M'atrasié vers sa founsur divino;
E tout d'un cop sènte qu'uno man
Es sus la miéu, uno man tant fino.

Douço man de Vierge! e, lou cor tremant
Ai leva lis iue: douz iue de diamant
Eron sobre iéu, caud coume uno flamo.
De-ginouioun siéu toumba sus lou sòu,
Quicon d'inefable espurant moun amo,
Coume l'or s'espuro au founs d'un crusòu.

Sènte, desempiéi, uno grando calamo
Aciéuna moun èime, e moun èsse te clamo,
Tu l'ounnipoutènto e la Maire de Diéu,
Tu qu'as fa flouri l'eterne amour dins iéu,
Tu que l'Univrrs noumo la subre-bello,
Tu qu'as fa flouri la Fe santo dins iéu.
De mi pouémo impur ai fach un recaliéu.
Me siéu purifica. Dins moun cor que reviéu
Un immène desir vers l'Autisme m'aubouro.
E vole, desenant, dins mi vers te canta
E lou jour e la niue, de-long tóuti lis ouro,
Perdu d'adouracioun davans ta grand bèuta.

Vierge! Maire de Diéu! toun noum, Mario, flouro
Coume un encèns sacra que dóu cèu s'evapouro.

Lou 9 de Juliet 1934.

Φ Φ Φ Φ Φ

CAUSA LÆTITIÆ NOSTRÆ

O font d'eterno gau! O lus d'eterno vido!
Lou qu'a jarnai senti toun aflat dins soun cor
Camino en de draiòu councha de labarido.

Lou qu'a jamai senti toun aflat dins soun cor
Es coume un bastimen perdu dins la tempèsto
A travès lis estèu sènso avera lou port.

Es coume un bastimen perdu dins la tempèsto.
Mai que l'auro s'amaine c s'esvarton li niéu,
Tourna lou cèu sourris e la mar es en fèsto.

Mai que l'auro s'amaine e s'esvarton li nièu,

L'ome sènt dins soun cor uno inmènso calamo
Toumba de l'infini coume l'alen de Diéu.

L'ome sènt dins soun cor uno inmènso calamo:
Te prègo, Vierge Santo, e dins lou ravimen,
Sa pensado s'enfioco au soulèu de toun amo.

Te prègo, Vierge Santo, e dins lou ravimen,
A sis iue, se durbis l'orto paradisenco,
E se fai dins soun èsse un grand tremudamen.

A sis iue se durbis l'orto paradisenco:
Te vèi: siés assetado entre-mitan di flour,
Enmantelado d'ange i formo verginenco.

Te vèi: siés assetado entre-mitan di flour,
L'aire es plen de perfum e de cant d'alegrìo,
Un nimbe esbarlugant gisclo de ta belour.

L'aire es plen de perfum e de cant d'alegrìo;
Dis aubre espalanca touumbo la frucho d'or,
D'aucèu de paradis volon dins la ramiho.

Dis aubre espalanca touumbo la frucho d'or;
Lou sòu es un margai flouri de perlo fino,
E li flour an d'encèns e de mierro à plen bord.

Lou sòu es un margai flouri de perlo fino.
Arcange e Serafin en raubo de soulèu,
Trone. Douminacioun, tout t'adoro e se clino.

Arcange e Serafin en raubo de soulèu
Dins la roundo dis astre au mitan dis estello
Largon à l'infini toun amour sobre-bèu.

Dins la roundo dis astre au mitan dis estello,
Dins l'infini vivènt de neste Segnour-Diéu
Baisses lis me sus nautre e neste cor barbèlo.

Dins l'infini vivènt de neste Segnour-Diéu
Prègo pèr neste mounde e pèr sa labarido
O Vierge! Siés la pas e l'espèr dóu roumiéu.

Prègo pèr neste mounde e pèr sa labarido
O Font d'eterno gau! O Lus d'eterno vido!

Lou 27 de Mai 1934.

Φ Φ Φ Φ Φ

VAS SPIRITUALE

Demoro de l'Esperit Sant
Ount lou favòni caressant
Canto à l'entour dins la ramiho:

Demoro benesido, ounte l'Esperit Sant
Canto coume l'aucèu canto dins la ramiho.

Douço demoro ounte bresihò
Dins un alen de pouësio
La voutes de Diéu disènt ti laus.

L'Univers tout entié 'm' un long resson bresihò
Toun noum aguste e sant en un eterne laus.

Au pèd de la demoro, un lau,
Ounte lou cèu es coume enclaus,
Te miraio emé lis estello;

E ta casto belour, lindo coume un grand lau,
Miraio lou soulèu, lou cèu e lis estello,

E dins aquéu lau siés tant bello,
E tant de graci t'enmantello
Que lou mounde es a ti geinoun.

En tu l'Esperit Sant, o Rèino subre-bello!
Doumino, e l'Univers, t'adoro à dous geinoun.

Sus l'aigo lou cèu de-clinoun
En se mirant escrieu toun noum,
Toun noum inefable, o Mario!

Toun amo es coume un clar linde e pur; de-clinoum
Lis Ange amourousi vènon béure, o Mario!

Tu siés la toco, siés la vio,
Siés l'ensiganço ounte s'avio
Tout cor d'ome asseda de Diéu.

En Tu l'ispiracioun trovo sèmpre sa vio
En Tu i'a la pensado eternalo de Diéu.

Toun regard fai lume au roumiéu
Qu'espèro en Tu dins li catiéu
E dur camin d'aquesto vido.

Vierge de coumpassioun apares lou roumiéu.
Lou roumiéu d'ideau long de sa pauro vido.

L'amo d'adouracioun ravid
En Tu se sènt rejouenido
E respelis à toun aflat.

Mougu de l'Esperit d'amour, l'amo ravid,
Pouèto e musician canton à toun aflat.

Dison que siés coume lou blad
Tant puro e moundo e que l'esclat
De ta belour emparadiso.

Dison que toun bon cor pietadous es un blad,
E quau se n'en nourris au cèu s'emparadiso.

Touto paraulo es impreciso.
En van l'esperit se ié fiso
Pèr espremi lou ravimen.

Feble es lou verbe uman; paure quau se ié fiso
Vierge, pèr esprima lou divin ravimen

En quau lis ange eternamen
T'adoron dins lou fiermamen.

Lou 31 de Mai 1934.

Φ Φ Φ Φ Φ

ROSA MYSTICA

D'uno eterno blancour, dins l'ort paradisen
Flouris la roso subre-bello.
Sutiéu comme lou fum que mounto de l'encèns
E mai noumbrous que lis estello,
Arcange e Serafin, d'amour trefoulissènt,
Canton de dóuçi cantinello.
Sis alo de diamant dins l'azur brusissènt
Lóugiero coume de dentello
La ventoulon, fasènt sus elo coume un vèu
Ounte jogo irisa lou trelus dóu soulèu.

La roso subre-bello eiçavau dins lou mounde
Flouris sus l'aubre de la crous,
Roujo coume un roubin meravihous e mounde
Contro lou pitre glourious
Dóu Diéu que, pèr sauva l'Ome douno en abounde
Sa vido e soun sang generous;

E la rosò, enlaçant de -soun fuiage dounde
E de soun brancage espinous
Lou bos divin, ié fai uno ardènto courouno.
E la rosò e la crous s'estregnon de poutouno.

La rosò sobre-bello es dins tòuti li cor,
Dins tòuti se tèn escoundudo;
En germe simplamen quouro l'esperit dor,
Quouro l'amo rèsto caludo;
Mai en flour trelusis coume lou soulèu d'or,
Dins tòuti lis amo nascudo
Au Verbe dóu Segnour, au divin estambord
Qu'au cèu lis enauro esperdudo.
La rosò sobre-bello es Tu, Maire de Diéu,
Dins l'Ome sus la crous, dins li bras de toun Fiéu

Lou 29 d'Abriéu 1934.

Φ Φ Φ Φ Φ

TURRIS EBURNEA

Iéu vese eilamoundaut sus la cimo d'un mourre
Inmènso s'auboura touto blanco uno tourre,
Lou front perdu dins lou soulèu.
D'evòri lou mai pur bastido, si muraio
Soun coume de mirau, lou cèu se ié miraio
E la mountagno emé sa neu.

La tourre e la mountagno an li pèd dins l'abisme,
N'en mounto, espaurissènt, un brut de cataclisme
Emé de blasfème infernau.
En d'espés revoulun de vapour enfecido,
Grouon d'orre demoun i pensado oumicido,
De chourmo d'esse criminau.

D'arcoulan glourious dins l'etèr se desplegon,
Subre si reviroundo, à grands envòu, s'enregon
D'Ange jougant de l'arpo d'or.
L'evòri de la tourre a li rebat dóu prisme,
E ressono vibrant is inne de l'Autisme
Que lou Cèu canto emé desbord.

Avau di gourg negras mounto un murmur de dicho
E de prejit feroun: es l'armado maudicho
Preparant l'assaut de la lus.
Mai, avuglo subran, retouumbo fourro-bourro
Is oundado dóu crime ounte Satan s'amourro

L'Infèr a de flus e reflux.

L'azur sènsoun front s'es dubert; n'en davaló.
Emé la resplendour d'uno aubo bourealo,
D'Arcange is alo de diamant
Pèr courouna la tourre. E de l'evòri raio
La font d'un clar divin. L'aigo lindo miraio
Lou Cèu d'amour, lou Cèu cremant.

L'aigo lindo recuerb lou reiaume infernouge
Ounte rouiga d'irour, au mié de brasas rouge,
Satan, l'Aucibèu e Mamoun
Cercon, pèr li dana, quauqui nouvèu suplice;
E tau que de serpènt ourrible, emé delice,
Escouton sibla li demoun.

Aquelo tourre, es Tu, Vierge autiero e sublimo.
Recate assegura pèr l'ome que trelimo,
L'amo aclapado de remors.
Vierge prègo pèr éu, pèr l'enfant, pèr la femo,
Pèr nous-autre, mesquin, pèr touti li lagremo,
Quand vendra l'ouro de la mort.

Lou 10 de Mai 1934.

Φ Φ Φ Φ Φ

DOMUS AUREA

Carismo pas, repaus e bèn-ananço,
Tèmple coumoul de divino esperanço,
Ount jour e niue canto e viho l'amour
En soun desir de Dieu e sa temour,

Sa foundamento es eiçavau sus terro,
E sa téulisso au mounde dis esfèro
S'en vai se perdre en uno eterno lus;
Si grand paret d'azur n'an lou trelus.

Formo, e perfum, e coulour, e musico,
Tout es aqui d'uno béuta magico
E d'ametisto e de linde cristau.
A la perfin mounton si gràndi nau.

Dous e manèu ansin que de poutouno,
De long dardai ié servon de coulouno,
Quouro daura coume un soulèu tremount,
Quouro oupalin coume sobre li mount

Lis iue risènt de l'Aubo que s'esviho,
Quouro irisa de lusènti ceniho.
De formo puro en fum farfaricous
Canton sèns fin, e si cant melicous

Lauson lou Fiéu de l'Ome dins sa glòri,
Lou Segnour-Diéu, lou Criste de vitòri.
E tout paupito e vibro ensemblamen;
Tout se ié mòu armouniousamen,

Tau que lou cor inmènse d'uno glèiso
Dins la clarta dóu soulèu que s'amaiso
Tras la fougour intènso di veiriau.
Sus un autar d'ile en flour se tèn siau

Un cors de Vierge inefablo en preguiero.
Sus sa belour la creacioun entiero
'Me tout ço qu'a de mai pur, de mai aut,
Vèn se mira coume dins un mirau.

Aquelo glèiso es tu, Vierge divino!
Ta resplendour sus lou mounde doumino;
En toun amour nosto amo defalis,
E lou pecat dóu mounde s'esvalis.

Lou 26 de Mai 1934.

Φ Φ Φ Φ Φ

JANUA CŒLI

Travessado d'uiau e de diamant cuberto,
Dóu cèu sènso counfront li porto soun duberto.

Un dardai encegant ié flambo e n'en davaloo;
Es de l'amour divin la lumiero eternalo.

Apafia d'un tapis de flour incouneigudo,
Un escalié gigant se perd dins l'estendudo

Fin qu'i bord d'uno mar inmènso que salivo,
Pourtant d'estello d'or dintre sis aigo vivo,

Em'un grand cargamen d'astre en de balancello.
L'arc-de-sedo ié ser de velo e de courdello.

Sus lou grand escalié, vesti de clar de luno,
Uno roundo d'Arcange, en cantant, revouluno.

De serafin fougous vènon, en coumitivo,
Reçaupre l'astre d'or de la nau que s'esquivo.

Clantisson, enterin sus l'alen dóu favòni
Dis arpo celestialo uno douço sinfòni.

Pertout de cor, pertout de grand batemen d'alo,
E de formo aerenco, e de voues virginalo.

Pertout de flour, pertout d'ile, de tuberouso,
Plumacho, tulipan, roso meravihouso,

E di grands encensié de safir, prefumado,
En un vèu oupalin s'enauron lis oundado.

Amount, sus lou lindau de la porto, belòri
Dóu cèu paradisen, la Vierge es dins sa glòri:

Nous mostro dins si bras soun Enfant, lou Messio,
L'Ome-Diéu anouncia pèr touto proufecio,

E t'adouran, front clin, dins la pousso, o Mario!

Lou 17 de Mai 1934.

Φ Φ Φ Φ Φ

STELLA MATUTINA

Ourlo la brefounié, lou cèu es sènso estello,
Negre coumo un toumbèu, e la mar reboumbello
Enjusco dins li nivo ounte uiaussio lou tron
Barrant de rai de fiò l'espaci sèns counfront.
E lou batèu perdu sus lis erso se giblo;
La mort, en ricanant, dintre li velo siblo,
L'equipage tremolo e lucho emé terrou
Contro l'aigo e lou vènt e lou cèu en furour.
Lucho desespera, lucho em'angouisso, quouro
Uno vaigo lusour dins lou cèu s'alegouro.
Bounasso vèn la mar; dins li nivo estrassa

Coume dins li ple d'uno raubo
Lóugieramen l'on vèi passa
Lou jouve sourrire de l'aubo.
Lou batèu, fernissènt
Se redràisso emé gràci;
L'equipage rènd gràci
A soun Diéu benfasènt.

Lou cèu s'endiamantino,
L'estello matutino
Anóuncio lou soulèu
Vesti de pourpro e d'or que s'enauro autant-lèu.

Ansin l'ome perdu dins la niue sènso espèro,
Dins la niue di passiou, dins la tempèsto fèro
Sourgido de l'abisme ounte ris l'Aucibèu
Encitant d'uno voues mai douço que lou mèu
I vice moustruous rousigaire de l'amo,
I lussùri sèns noum, poustèmo, sang e flamo,
A l'ourguei pivelaire emé sis iue de serp.
L'ome sentènt sus éu l'alenlo de l'infèr,
Tremolo d'espavènto au founs de sa counciènci.
En van cerco pertout la pas e lou silènci,
Enfin prègo soun Diéu, li plour bagnon sis iue.

D'un jour nouvèu l'entre-lusido
Coucho lis ourrour de la niue;
L'aubo se mostro amourousido.
L'ardado di demoun
S'enfugis impoutènto,
E — l'amo repentènto —
Vèi l'estello eilamount
Que devers éu se clino,
L'Estello matutino,
Vierge, Maire de Diéu,
Ié sourrire, implourant pèr éu soun divin Fièu

Lou 4 de Mai 1934.

Φ Φ Φ Φ Φ

REFUGIUM PECCATORUM

A ti pèd s'escrasant, ourlant coume de loup,
Escalant ti geinoun, et jitant de senglout,
S'arrapant à ti bras, long de ti flanc, o Maire!
L'orde troupèu di pecadou

S'amoulouno e se trosso ansin qu'au vènt bramaire
Li nivo sournaru, s'amoulounant dins l'aire.
E Tu, Maire de Diéu, Vierge de carita,
Vierge adourable au cor amaire,

Levant au cèu lis iue, retènes acata
Sont toun mantèu d'estello aquelo Umanita
Que plouro et que gemis e sènso fin se lagno;

Te prègo e demando pieta.

E de senti mounta devers Tu la magagno
Di vice e di passiou, de n'ausi la plouragno,
O Vierge! cor doulènt, laisses toumba ti plour
Coume au matin toumbo l'eigagno

Benfasènto; emplissènt lou calice di flour.
Ansin dóu pecadou s'apaimo la doulour.
E, pretouca, toun Fiéu à la naturo umano
Perdounou en soun inmènse amour.

Ai vergougno de iéu. Que ta prègo abelano
Outèngue lou perdoun de ma vido foulano,
O Vierge-Maire soubeirano!

Lou 26 d'Abriéu 1934.

Φ Φ Φ Φ Φ

CONSOLATRIX AFFLCTORUM

Li femo dison: — Qu'es la vido? Un long martire.
E brèsson lou banèu
D'enfantoun qu'en dourmènt dis ange an lou sourrire.

— Aro que deveni? pluron lis ourfanèu
Qu'à travès di carriero
Noun sachènt ounte ana s'en van coume d'agnèu.

— Malaut, ai abena ma vido touto entiero,
Se pènso l'oubrié
Dins l'usino au mitan di mourtàli pòussiero.

— Me rèsto que la mort!» bramo dins soun encié
Lou gros ome d'afaire
Qu'arrouina, tout d'un cop, toumbo à la cativié.

— Moun amant es parti! Siéu perduto, o ma maire!
E m'a fourçado, ai-las!
Crido la pauro chato en soun aspre desaire.

— Soufrisse jour e niue sènso ges de soulas,
Lou mouribound souspiro.
A la glèiso, deman, faran souna li clas.

E dins soun pesaroun, lou paure que deliro,
A mita mort de fam,

E lou desespera plen de lagremo e d'iro,

Tóuti li soufrachous jouine o vièi, femo, enfant

E tutto la misèri,

E tutto l'afliciou d'un mounde plen d'afan,

Pariero à la rumour que mounto d'un grand cièri

Dins la lus dóu soulèu

Emé si crid de mort, emé si vitupèri,

Pariero i nivoulas ennegrissént lou cèu

Quand mounto la chavano,

Pariero i fum d'usino, i pousso di troupèu,

Sufoucant, ensourdènt, mounto dins l'estendudo

O Vierge de bounta,

Vierge counsoularello, O Vierge soubeirano,

Mounto t'enmantelant de rumour de pieta,

E toun grand cor de maire

En soun ardènto prègo esmòu l'immensita.

De graci que soun Fiéu a dins soun cor amaire

E de soun Fiéu l'amour,

La pas e lou perdoun se respiron dins l'aire.

Ansin counsoulairis, Vierge, muden en flour

Li segren d'aquest mounde e l'umano doulour.

Lou 14 de Mai 1934.

Φ Φ Φ Φ Φ

REGINA ANGELORUM

Bèl eissame de parpaioun
'mé sis alo d'argènt, d'or e d'azur fougoso,
Claro esluciado de raioun,

De galants Anjounèu uno ard,ado gaujouso
Ié fan coume un nimbe vivènt
A la Rèino celèsto assetado, courouso,

Sus un arc-de-sedo mouvènt
Enciéulant neste mounde en sa grand reviroundo
Pèr-delai l'aurige e li vènt.

E d'Ange en revoulun mai rabènt que d'iroundo
Van, vènon de la terro au cèu,

A sa Rèino adusènt la plouradisso mouno

De l'enfantoun dins soun banèu,
Li lagremo di chato e di mesquin la lagno,
Se sentènt proche dóu toumbèu.

Dis Arcange, enterin, la divino cantagno
S'aubouro coume lou perfum
Que mounto di genèsto e di flour di mountagno.

E, tau que dins uno palun
Lou tremount dóu soulèu miraio e vous encègo,
De Serafin, en rai de lum,

Fuson: sis alo d'or fan coume un brut de sègo
Dins li pradas de l'estelan,
Ounte escrivon soun noum en de flambànti rego.

E, bello dins soun mantèu blanc,
Coume uno aubo d'amour, la Rèino, dins sa graci,
La Rèino au sourrire abelan

Vèi lou mounde angeli clina davans sa faci.

Lou 23 de Mai 1934.

© CIELd'Oc – Desèembre 2009